



歐陽文公圭齋集卷十三

廬陵鈞源族裔孫

本受冊校刊

詔

命相出師詔

國朝吉

書館藏

惟天惟祖宗混一函夏全付渺躬朕承丕基兢兢圖治罔
敢逸豫不謂邇者河南反賊乘此承平之久負國弄兵流
毒黎庶已常命將討捕屢獲渠魁戮以徇衆餘黨狂獬尙
逋嚴誅亦常肆宥開以自新怙終不悛致煩師旅太傅中
書右丞相脫脫爰自賊發迄今屢請董師致討朕以心膂
之親應難其請而期於自效誠懇益堅朕惟事體之大付
歐陽文公集

卷十三 詔

託實難匪資巨濟之才孰勝戡定之任今命脫脫以答刺
罕太傅中書右丞相分省於外總督諸道兵馬水陸並進
其樞密院御史臺各分官屬從行稟受節制無或有違務
要廓清妖沴永底隆平於戲太傅實左右朕躬其行在安
靖天下故分總揆之重屬以討賊之勞尙克欽承懋建丕
績故茲詔示想宜知悉

再命出師詔

朕承國家隆平之運四方無虞民不識兵士不講武於茲有年矣不謂邇者河南反賊弄兵搆難荼毒烝黎用是前歲大丞相脫脫請自出征一戰平徐朕惟股肱大臣宜朝夕在朕左右亟命召還分將致討豈謂因循遷玩條經二年湖廣荆襄雖常克復餘賊逋誅負固恣睢致使軍士暴露日久吾民供給困繁愁嘆怨嗟徹于朕聽朕不遑寧處乃命脫脫以答刺罕太師中書右丞相分省於外總督諸道軍馬振其威武刻日進兵殄賊安民以釋朕慮凡將士用命者賞不用命者誅賊衆來降者赦旅拒者戮於戲朕

歐陽文公集

卷十二 詔

二

與丞相共理天下者也天下多故朕軫其憂相任其勞理所必致汝往欽哉慎厥事事乃有濟圖厥功功乃有成往哉汝諧布朕威德措安吾民朕惟汝賴汝往欽哉

表

進遼史表

代右丞相脫脫撰

開府儀同三司上柱國錄軍國重事中書右丞相監修國史領經筵事臣脫脫言竊惟天文莫驗於璣衡人文莫証於簡策人主鑒天象之休咎則必察乎璣衡之精鑿人事之得失則必考乎簡策之信是以二者所掌俱有太史之稱然而天道幽而難知人情顯而易見動靜者吉凶之兆敬怠者興亡之幾史臣雖述前代之設施天意有助時君之鑒戒遼自唐季基於朔方造邦本席於干戈致治能資於黼黻敬天尊祖而出入必祭親仁善隣而和戰以宜南

歐陽文公集

卷十三 表

三

府治民北府治兵春狩省耕秋狩省歛吏課每嚴於芻牧歲饑屢賜乎田租至若觀市赦罪則略合六典之規臨軒策士則恪遵三歲之制君慕漢高之爲帝托耶律於劉宗相擬鄼侯之爲臣更述律以蕭姓享國二百一十有九載政刑日舉品式備具蓋有足尚者焉迨夫子孫失御上下離心驕盈盛而釁隙生殘賊興而根本蹙變強爲弱易於反掌吁可畏哉天祐自絕天祐苟延國旣邱墟史亦蕪蕪耶律儼語多避忌陳大任辭乏精詳五代史係之終篇宋舊史埒諸載記予奪各徇其主傳聞况失其真我世祖皇帝一視同仁深加憫惻常勅詞臣撰次三史首及於遼六

十餘年歲月因循造物有待臣脫脫誠懼誠懼稽首頓首
欽惟皇帝陛下如堯稽古而簡寬容衆若舜好問而濬哲
冠倫講經兼誦乎祖謨訪治旁求於往牒茲修史事斷自
宸衷睿旨下而徵聘行朝士賀而遺逸起於是命臣以右
揆領都總裁中書平章政事臣鐵木兒塔識臣賀惟一翰
林學士承旨臣張起巖翰林學士承旨臣歐陽元翰林侍
講學士臣揭傒斯侍御史今集賢侍講學士臣呂思誠爲
總裁官中書選選儒臣崇文大監今兵部尙書臣廉惠山
凱雅翰林直學士臣王沂秘書著作佐郎臣徐昂翰林監
修臣陳繹曾爲修史官分撰遼史起至正三年四月訖四
歐陽文公集

卷十三

表

四

年二月發故府之積藏輯遐方之匭獻搜羅剔抉刪潤研
劇紀志表傳備成一代之書臧否是非不迷千載之實臣
脫脫等叨承隆寄幸覩成功載宣日月之光華願効涓埃
之補報我朝之議論歸正氣之直則辭之嚴遼國之君臣
有知善者喜而惡者懼所撰本紀三十卷志三十三卷表
八卷列傳四十五卷各著論贊具存體式隨表以聞上塵
天覽臣無任激切屏營之至謹言

進金史表

竊惟漢高帝入關任蕭何而收秦籍唐太宗卽阼命魏徵以作隋書蓋歷數歸真主之朝而簡編載前代之事國可滅史不可滅善吾師惡亦吾師矧夫典故之源流章程之沿革弗披往牒曷蓄前聞惟此金源起於海裔以滿萬之衆橫行天下不十年之久專制域中其用兵也如縱燎而乘風其立國也若置郵而傳命及熒興於禮樂乃煥有乎聲明嘗循初而迄終因考功而論德非武元之英畧不足以開九帝之業非大定之仁政不足以固百年之基天會有吞四海之志而未有一四海之規明昌能成一代之制

歐陽文公集

卷十三表

五

而亦能壞一代之法海陵無道自取覆敗宣宗輕動曷濟中興迨夫浚郊多壘之秋汝水飛煙之日天人屬望久有在矣君臣守義蓋足取焉我太祖法天啟運聖武皇帝以有名之師而釋奕世之愾以無敵之仁而收兆民之心勁兵擣居庸關北拊其背大軍出紫荆口南扼其吭指顧可成於僞功操縱莫窺於廟算懲彼取遼之暴容其涉河以遷太宗英文皇帝席卷雲朔而狗地并營囊括趙代而傳檄齊魯滅夏國以蹴秦鞏通宋人以逼河淮睿宗仁聖景襄皇帝冒萬險出饒風長驅平陸戰三峯乘大雪遂定中原太陽出而燭火燿正音作而衆樂廢爰及世祖聖德神

功文武皇帝恢宏至化勞徠遺黎燕地定都撤武靈之舊址遼陽建省撫肅慎之故墟於是張彙歸金史於其先王鷄集金事於其後是以纂修之命見諸敷遺之謀延祐申舉而未遑天歷推行而弗竟恭惟皇帝陛下緝熙聖學紹述先猷當邦家閒暇之時治經史討論之務念彼泰和以來之事蹟接我聖代初興之歲年太祖受帝號於丙寅先五載而朱鳳應世祖毓聖質於乙亥纔一歲而黃河清若此貞符昭然成命第以變故多而舊史闕者艾沒而新說訛弗折衷於大朝恐失真於他日於是聖心獨斷盛事力行申命臣等集衆技以責成書佇奏篇以覽近監臣等仰

歐陽文公集

卷十三表

六

承隆委俯竭微勞紬石室之書誠乏司馬遷之作獻金鏡之錄願攄張相國之忠謹撰述本紀十九卷志三十九卷表四卷列傳七十三卷目錄二卷裝潢成一百三十七帙隨表以聞

進宋史表

代丞相阿魯圖撰

開府儀同三司上柱國錄軍國重事中書大夫右丞相監
修國史領經筵事提調太醫院廣惠司事臣阿魯圖等竊
惟周公念先業之艱難七月之詩是作孔子論前王之文
獻二代之禮可言故觀趙氏隆替之由足見皇元混一之
績欽惟世祖聖德神功文武皇帝初由宗耶親總大軍龍
旂出指於離方羽葆歸登於乾馭櫛風沐雨詎辭跋履之
勞略地攻城咸遵稟受之算揚船而平江漢卷甲而克襄
樊茶行弔伐之師昭受寵綏之寄及夫收圖書於勝國輯
黼尋於神京拔宋臣而列政塗載宋史而歸秘府然後告
歐陽文公集

卷十三表

七

成郊廟錫慶臣民推大賚以惟均視一統之無外樞庭偃
武旣編載定之勲翰苑摘文尋奉纂修之旨事機有待歲
月易遷屢朝每切於繼承多務未遑於制作臣阿魯圖等
誠惶誠恐稽首頓首欽惟皇帝陛下恢宏至道紹述丕謨
往行前言樂討論於古訓祖功宗德思揚厲於耿光惟我
朝大啟基圖彼吳會後歸版籍視金源其未遠紬石室以
具存及茲累洽之時成此彌文之典命臣阿魯圖左丞相
臣別兒怯不華領史事前右丞相臣脫脫爲都總裁平章
政事臣鐵木兒塔識御史大夫臣惟一翰林學士承旨臣
起巖臣元治書御史臣好文禮部尙書臣沂崇文大監臣

宗瑞爲總裁官平章政事臣納麟臣伯顏翰林學士承旨
臣達識帖睦邇左丞臣守簡參議臣岳柱臣拜住臣陳思
謙郎中臣幹鑾臣孔思立等協恭董治史官工部侍郎臣
幹玉倫徒秘書卿臣泰不華太常簽院臣杜秉彛翰林直
學士臣宋褰國子司業臣王思誠臣汪澤民集賢待制臣
于文博翰林待制臣張瑾臣貢師道宣文閣鑒書博士臣
麥文貴監察御史臣余闕太常博士臣李齊翰林修撰臣
劉聞太醫院都事臣賈魯國子助教臣馮福可太廟署令
臣陳祖仁西臺御史臣趙中翰林應奉臣王儀臣余貞秘
書著作左郎臣譚慥翰林編修臣張翥國子助教臣吳當
歐陽文公集 卷十三表 八

經筵檢討臣危素編劄分局彙粹爲書起自東都迄於南
渡紀載餘三百載始終纔一再期考夫建隆淳化之經營
景定咸淳之潤色慶歷皇祐以忠厚美風化元豐熙寧以
聰明紊憲章馴致紹聖紛紜崇寧荒亂治忽昭陳於方冊
操存實本於宮庭若乃建炎紹興之圖維乾道淳興之保
又正直用則人存政舉邪佞進則臣辱主憂光寧之朝僅
守宗社理度之世日蹙封疆顧乃拘信使以渝盟納叛臣
而侵境由權奸之擅命啟事覺以召兵厥後瀛國歸朝吉
王航海齊亡而訪王蠋乃存秉節之臣楚滅而論魯公堪
矜守禮之國載惟貞元之會合屬當泰道之熙明衆言淆

亂於當時大義宣昭於今日矧先儒性命之說資聖代表
章之功先理致而後文辭崇道德而黜功利書法以之而
矜式彛倫賴是以匡扶雖微董狐直筆之可稱庶逃司馬
寡識而輕信至若論其有弊亦惟斷以至公大概聲容盛
而實德衰論建多而成效少且辭之繁簡以事而文之古
今以時舊史之傳述旣多雜記之蒐羅又廣於是參是非
而去取權豐約以損增事嚴敢計於疾徐日積亦虞於玩
愒臣阿魯圖等忝司當揆實預提綱圖詢在局之言靡不
究心乃職第述作之才有限而報効之志無窮倘垂清燕
之觀尙助緝熙之益曰若帝堯曰若帝舜惟聖心稽古之
歐陽文公集

卷十三表

九

功監於有夏監於有殷乃臣子告君之道謹撰述本紀四
十七卷志一百六十二卷表三十二卷列傳世家二百五
十五卷裝潢成四百九十二帙隨表塵獻以聞

進經世大典表 至順二年三月進

堯舜之道載諸典謨文武之政布在方策道雖形於上下
政無間於精粗特於紀錄之間足見彌綸之具是以秦漢
有掌故之職唐宋有會要之書於以著當代之設施於以
備將來之考索我國家受命龍朔纘緒鴻基發政施仁行
葦之忠厚世積制禮作樂關雎之風化日興紀綱具舉於
朝廷統會未歸於簡牘欽惟欽天統聖至德成功大文孝
皇帝陛下總攬羣策躬親萬幾思祖宗創業之艱難與天
地同功於經緯必有鋪張以揭曠日必有述作以藏名山
爰命文臣體會要之遺意徧勅官寺發掌故之舊章彷彿
歐陽文公集 卷十三 表 十

禮之六官作皇朝之大典臣某叨承旨諭俾綜纂修物有
象而事有源質爲本而文爲輔百數十年之治蹟固大畧
之僅存千萬億世之宏規在鴻儒之繼作謹繕寫皇朝經
世大典八百八十卷目錄十二卷公牘一卷纂修通議一
卷裝潢成帙隨表以聞伏取裁旨

冊文

明宗皇帝尊號冊文

伏以得名得位大君之盛德必兼事亡事存孝子之至誠
如一爰徵古訓追上徽稱欽惟皇考皇帝陛下秉純乾之
剛居洵震之長當世祖之不構接武皇之正傳歷試諸艱
侔蹤虞舜舊勞於外儷跡商高當龍躍以在淵變化莫測
其量及雷行而育物動靜不違乎時茲豈非順天乎若夫
綸言未頒而仁聞之馳滿天下寶璽初受而皇極之建繫
人心茲豈非立道乎至於親儒生於汗馬之場輯宗盟於
橐弓之頃茲豈非獻文之教知武之功乎聖莫大於無爲
歐陽文公集 卷十三 冊文 十一

孝莫大於善繼元造固難乎擬議鴻名宜罄乎宣昭矧往
事之艱貞增渺躬之怵惕欲旌永慕庶享多儀謹遣攝太
尉臣某奉玉冊玉寶追上尊號曰明宗順天立道獻文知
武大聖皇帝

銘

友吾銘

吾友號

吾仁我以友我是須輔雖資友取友在吾人肯友吾視吾
可否善不吾若友吾何取尊者友卑貴不吾見乃忘勢分
乃友貧賤賤者友貴所貴吾立傲固不可佞豈可習有人
於此如澤相麗吾友友吾交盡友誼曾子之學肖先吾身
吾友爲誰必顏其人惟顏與曾尙友千載頌詩讀書吾志
吾在

敬心齋銘

人之有學治心爲先心得其理乃聖乃賢賢聖之爲其要

歐陽文公集

卷十三 銘

十一

曰敬清明在躬齋莊中正敬不於貌敬於其心思而儼若
上帝汝臨無貳無虞惟精惟一飭我天君守而勿失學之
終始惟敬靡他身之主宰非心而何克敬在心亦敬亦聖
聰明爲堯溫恭者舜湯曰日躋姬文緝熙孔嚴三畏顏謹
四非孟子養身尤善養氣彼何人哉希之則是勗爾敬心
心與銘鐫爲此銘者太史氏元

戚友劉君思清以其猶子尙敬謁予瀏上予嘉其好古
將掖而進道乃爲之銘其敬心齋請事斯語予日望之

說

楊鑑瑩之字說

劉文廷堦

工制器皆有陰陽其陽文其陰質古者物善技精故表裏一文質均後世物多窳技售拙故金有滓玉有瑕絲有類則爲文以蓋之若質之素乃爲貴耳惟鑑不然其質之美見於面其文之美見於背蓋鑑主於瑩故也瑩自外徹內用能以內燭外鑑之瑩未嘗爲文而天下之文無不入焉吾故謂鑑有君子之道以其先質而後文也雖然百鍊而金精金精而鑑瑩豈一日之功哉人質亦然所資於學也大矣安成學者楊其姓鑑其名瑩之其字者是誠齋文節歐陽文公集

卷十三

說

三

公諸孫也質美近道蔚然有文通春秋三傳學用薦爲國子四門館生圭齋歐陽元書是說以贈之

劉叔籽字說

安成劉生名士疇字叔籽從余謁字說夫疇者易治之田之名也籽者旣立之苗又壅其根使之梗有據以禦水旱者也子名疇字叔籽尊公爲子計者周矣農在四民能衣食其三者工之技商之利或足以病之先王有厲禁矣惟士與農同體故耕學往往並稱於經士生斯世筋力不匱才智有餘退恃可治之田進挾可用之學傲然無求於穹壤間以聽命於造化世之偉丈夫也然古今則幾人焉進

爲鹵莽之學以倖一時之遇退爲滅裂之耕以倖一歲之秋滔滔者不乏也然豈願吾友效之哉實耕學於一貫堅智力於一勤疇有其地籽有其本國之良士又良農也余爲大司成時生之尊公常博爲國子助教生以胄子入學日升堂講論余愛生之聲琅琅而論纏纏也今別又數年矣生勉乎哉

族子章晦字說

宗兄議翁子耀旣冠當字謁余字之余字之以章晦又申其說以聶之今天下之有光而能燭者水也火也而二者不同焉水內明外暗火內暗外明然世以水鑑者什一以

歐陽文公集

卷十三 說

西

火照者什九豈非外闇內明者晦養其明假物而明始見外明內闇者明出乎物遇物而明自生君子則之內外交養明晦相資猶水火日用於世而明不匱豈不以是與或曰朱晦翁初受教於屏山劉氏有木晦於根春華曄敷之言由是號晦菴今子以水火言明晦何居余曰木受氣水而傳氣火者也晦明明晦豈二本哉余生平嘉吾歐陽氏之業爲儒者甚多章晦聰明好學尤多藝能年則弱冠已見館穀於大家余字以晦蓋望其顯融者奚止如今日所觀者云

李觀尚賓字說

鈴邑大姓曰西溪之李有名觀而字尚賓者吾宗用經之甥也聞余訪族至其外舅家遠來卽余求尚賓說夫觀一字而有二義以觀示言者九五之主一卦也以觀瞻言者一卦之宗九五也六四一爻去九五最近故其繇曰觀國之光利用賓於王謂其以陰柔而近陽剛有仕而覲於上之象今子名觀而字尚賓可謂知所尚也已然亦何道而臻茲乎故愚嘗謂觀示觀瞻之義猶未足以盡乎觀九五之觀我生上九之觀其生二爻皆有觀省其己之義爲六四之君子者蓋亦退而觀諸己乎利用賓於王實在我之所自致也周官之法三歲大比考其德行道藝而興其賢

歐陽文公集

卷十三

五

者能者鄉老及鄉大夫帥其羣吏與其衆以禮賓之獻其書於王則再拜而受之夫德行道藝之三物者士之可自勉者也今科目復矣子勉於學由是而觀國之光利用賓於王孰禦子哉余聞尚賓家多書又多山水之勝常作亭名曰兩山間予旣扁之矣用功於幽閭深靚之鄉策勲於昭明正大之地六四之觀之占屬之子矣

彭以恭字說

學者以字從名有內外之辨斯不瀆也安成劉仰更致其表弟彭尚謙字以恭者之請求予爲字說以贈夫謙者恭也皆見乎外者也謙之中有物恭之中亦有所主何爲有

物謙之象曰地中有山卑者蘊高者於其中中有屹然不可犯之意特有之而不居則見乎外者自然而謙也何爲有所主主者一而已矣主一之謂敬有確乎不可拔之意能出乎無僞則見乎外者自然而恭也謙也恭也會謂色取而可乎善乎君之爲字也能求諸乎中則容之著乎外者無以尙也謙之失曰輕恭之失曰足祛此二者之失求諸中斯可彭氏多文人吾以恭好學不倦故樂以內外之說告之

琅溪說

吾家自鈴南之防里徙長沙之瀏陽族屬之近者亦徙安

歐陽文公集

卷十三 說

共

成北境上是爲早禾田號曰早歐有名俊字用綱者早歐之秀者也常扁其讀書之室曰琅溪頃過余瀏上謁余爲之說夫玉瑩然而澤者琅玕也溪之色幽幽其似之乎琅然而清者珩璜也溪之聲淙淙蓋又近之然君子之比於玉以有德也取於水以有本也豈徒以聲色爲尙哉玉有德故用於宗廟朝廷水有本故達於江河淮海善推其所爲而已矣吾用綱中有外著聲與實流琅溪云乎哉

彬彬說

吾宗歐陽氏之甥新澤胡君復字曰於信而名其讀書處曰彬彬因宗人宜翁兄謁余爲說夫彬彬之言昔吾夫子

嘗兩言之其一曰文質彬彬然後君子其一曰假我數年若是我於易則彬彬矣釋者謂彬彬猶班班物相雜而適均之貌大概質不勝文文不勝質二者適均彬彬可想見也獨易之彬彬義安取乎豈非中古之言易者象或過乎質理或過乎文必經聖人之手而後彬彬與雖然愚嘗竊以謂彬彬固貴乎二者之適均特物相雜而易見青黃赤白是爲文章則彬彬卽文矣君子之論終不以彼而易此也禮器曰甘受和白受采忠信之人可以學禮君子先質而後文之意豈待文勝而後救之與損其有餘而補其不足在夫善學君子者矣於信妙齡老蒼爲學近裏以孝弟歐陽文公集

卷十三說

七

貢試於鄉故余樂有以進之

齊吾說

族弟巽翁號齊吾因字以爲號者也兄原功甫爲之說曰後天之易巽東南之卦也萬物至是而潔齊焉然東南之爲位以一歲言之則孟夏建巳之月也以一日言之則日至禺中之時也以人之一生言之則二十以至三十之年也物生齊於孟夏之月人事齊於禺中之時大抵然也士爲學弱冠以至壯歲就厥條理則成人之功過半矣宮庭有儀衛焉排比而不亂軍旅有行伍焉整凝而不淆府庫有委積焉屏當而不煩然後爲齊也齊之功豈易集哉昔

者聖人自序爲學之功每十歲一進唯十有五志於學至三十而立獨多其年豈非爲學求齊於斯時亦難矣乎然則齊之道當何先曰齊與齋同義又訓一齋主乎敬敬主乎一求之之要無踰敬者或曰巽東南之卦其氣溫厚敬非肅不能何事於巽乎曰不然巽之爲言順也順莫大乎禮禮莫大乎敬敬則有序而順有序而順則和生焉巽在其中矣巽翁謝曰吾今而後知齊吾之綱領矣請書其說以贈巽翁一名巽亨博洽而聰敏吾宗之英也

奇峯說

天地間氣形惟正與奇受其正者爲正受其奇者爲奇山

歐陽文公集

卷十三

說

之有五岳水之有四瀆正也然五岳有泰華峻嶒而峭拔四瀆有清濟潛洑而趵躍是正之中有奇者焉人亦然端莊靜重之士偶遇事變未嘗無超邁卓絕之行也特水之奇以衝激而見人之奇以感發而見皆因動而見奇者也唯山之奇在峯雖靜亦奇孤負之姿騰蹕之勢有自然之奇不可以言喻者故士之靜獨隱居而有奇節者往往則之安成劉君世良著奇峯以爲號吾旣以靜而奇者况之然劉氏數世皆名儒竊意斯文之福澤將鍾於世良之身所謂因動以見其奇未必見舍於當世奇之體用於是乎

備歟

明軒說

族兄晉翁號曰明軒夫晉之明有離象也說卦離爲日爲火晉之象君子以自昭明德晉之明以離離之明爲日爲火君子之自明心乎性乎愚嘗謂日者火之精是日以火爲明也然火自日出者也心者性之邪是心之明有性在其中也而性實自心出者也故曰盡其心者知其性也日與火之明心與性之明固無二也雖然日以屢入養其明火以屢改養其明心之養其明也以虛性之養其明也以靜明有所養自不息也明而誠其道在斯乎晉翁兄博學之士也其涉歷世故又久所以養其明而日進者俟余言歐陽文公集

卷十三說

九

哉姑以是爲明軒說以應其命爾

劉棻安說並銘

安成劉君彥棻才氣敏達學問充裕因其有彥棻之字朋友號之曰棻安彥棻不能辭求一言以自勗予昔受讀論語子温而厲一章嘗謂温而厲一辭若總下兩語所謂威而不猛棻而安者威自厲出不猛有温在其中此易曉也威而不猛可總於温厲棻而安何所附屬曰書言棻作肅又有所謂嚴棻嚴也肅也非厲而何且二者非可久之道也持之而安惟温而厲者能之豈非互有所發明乎恨余生晚不獲質正前修因彥棻之請姑志臆說於此願與識

者商榷之銘曰人之德性本無不備氣質或偏動鮮無媿
聖人所養全體渾然貌恭而安語默皆天希聖力行持久
持敬澄其氣質懿哉德性恭非勉強安亦從容聖功既熟
無適非中大舜命夔臯陳九德變化攸宜君子斯則千五
年後橫渠猶疑劉氏之子其殆庶幾

仁山說

增入

仁一側隱之端擴而充之萬境一仁也山一卷石之多引
而伸之四海一山也是故仁者樂山雖以靜蓋亦動意存
焉山不見所始揆之理可知仁之始實在寸念由寸念之
充至於不勝其用所謂有動意存焉者此也山始一卷仁
歐陽文公集

卷十三

說

辛

始寸念體驗云爾矣族姪以仁號仁山宗老圭齋贈以說

歐陽文公圭齋集卷十四

廬陵釣源族裔孫杰芝田校刊

題

恭題御賜石刻千文榻本後

今上皇帝得智永千文命近臣摹勒刻置宣文閣中所拓
墨本從官之有文學者則識以宣文閣寶而賜之授經郎
浦陽鄭深浚常嘗侍上經筵故預是賜可謂稽古之榮也
夫金璧珠寶天下貴賤之所同尚者也國家以旌有德賞
有功於所同尚者而不靳焉所以示恩也至於法書名畫
遇彌文之代時君聖性好古則其所尚有重於金璧珠寶
歐陽文公集 卷十四 題 一
矣於其文學侍從之臣不靳其所獨尚者而賜之所以示
異恩也鄭氏浦陽義門九世同爨朝廷嘗旌之今浚常以
斯文又膺是賜愚故願義門之子孫世世寶之上以無忘
聖天子好古博雅之志下以無忘乃祖父遭遇之由足以
垂久遠矣

題北行錄

士生休明之代區宇混一意之所之足跡皆可以達卽其
耳目之所覩記羣英攬華託諸翰墨議論之間異時奇文
偉績因是以有徵於來世也廬陵吳元凱挾其吟咏之學
卓犖之才其至京師與當代名縉紳劇談雄辨周諮國家

之巨麗而昇平諸福之物舉集一時於是黃鵠朱鴈之什人爭誦之至於登高眺遠追懷往昔風晨月夕排遣羈思佳句尤富使之得展所蘊於承明著作之地以任揚厲鋪張之風豈不大強人意乎三復興嘆題而歸之

題安成劉氏家譜

往年宗人南記修譜自吉州刺史琮遡歐陽亭侯上及神禹下逮安福府君萬不以地之遐僻族之蕃廣必旁蒐遠羅不少遺譜成且欲合祠吉州刺史安福府君爲不祧之祖集宗人之近者節春秋展敬祠下其規措不凡用志亦仁矣嘗因堯賓兄序之惜哉南記已矣安成劉君思清攜

歐陽文公集

卷十四

題

二

先世告身六七通求予識其後且示余家譜上推其祖之所自出下列各派之所同出徵兩漢唐宋以上至陶唐氏得姓以來之祖其意亦猶南記也余嘉其敦睦之誼圖分派別得別生分類遺意故爲之書且告之曰子歸爲我訪黃石宗人之賢者謝曰其毋廢譜學毋廢祠事庶幾余猶有望焉思清字清隱於予先世通家又同生癸未今爲湘鄉教官家譜則其從弟思復之所圖也

題西平李氏族譜

桓桓西平爲唐中興功著鼎彝德被黎烝當時賢良風雲依乘如渾侍中如馬北平曾幾何世系冷如水惟西平裔

趾美相仍更唐歷宋我元是承設科曰雋試吏曰能守令
之選臺閣之登表表愈偉爲時名稱子孫千億蟄蟄繩繩
天道之報信哉可憑予書其概寓勸以懲後之來者於焉
斯徵

題衆芳所存

安成劉伯仁號芳
所後以扁其齋

嗟衆芳之所在宜君子之盤桓巖班璘兮有菊畹紛披兮
有蘭朝菲菲兮紉佩夕采采兮爲餐通神明於鼻觀納上
清於泥丸却氛穢而益壽志無昏而氣完曩馨德乎先哲
託高風乎歲寒

題彭功遠先世手澤

歐陽文公集

卷十四題

三

先參政冀公曩善廬陵彭君士楚先公上庠高選雖治春
秋能通諸經忍見前代名文散逸每屬士楚收拾士楚至
則稱載充牣先公暇日亂紬而泛閱之擇其尤者別彙爲
帙士楚亦能朗誦先世詩義賓主迭論元兄弟漫不及省
先公勗之曰黃冊子會有行世時兒曹毋忽也公薨之七
年科舉興元首擢第追憶先訓不勝慨然泰定甲子彭公
冲所以詩經擢進士爲士楚從弟於是其家學益振他日
冲所子功遠來京師袖其曾祖坦軒祖碧野二先生及一
門諸父舊業程文蓋冲所題識手澤謁余求一言是蓋吾
先公平日之所購求而士楚之所樂誦者彭氏世科之左

券不在茲乎俯仰四十餘年科目廢而焜興而歛廢今
明詔復飭中書舉行元叨塵從臣初議闕下力贊其成又
適秉筆代言播告海內矣會將見程文復盛當世喜而志
於斯

題南谷居士自贊像後

士大夫自贊其真例多自抑之辭而生平自知之明往往
見於言表如善寫真者引鏡自照以圖其形宜無遺巧余
嘗銘南谷翁墓今觀其寫真自贊表裏純誠殆非丹青之
所能狀尤非發潛者之所可模寫也至正二年三月余客
瀏東厚田湯氏家齊吾弟攜此見過因贅數語於後

歐陽文公集

卷十四題

四

題五馬圖

卷中五馬龍者其誰疑有脫文如隔脂如行煙外如辨丸疑
而况南山四十萬匹中欲求流雲飛電之姿嗚呼世無伯
樂龍者其誰

題草蟲圖

蜂戀其房兮不可以游蛛待以網兮爲有所求曾不如蚨
蝶與草蟲兮飛躍之自由

題娛拙集

娛拙集者吾宗歐陽存中甫之作也其中古樂府諸篇情
景俱至追儀當時近體詩清新俊逸佳句層見是何吾宗

人之多才也題曰娛拙雖謙辭實出見解六朝劣於漢魏
得其巧未得其拙也晚唐媿於盛唐亦得其巧未得其拙
也繼自今拙日進則詩日進矣何時見存中甫重商榷之
題白麟溪三大字後

右白麟溪三大字前中書右丞相脫脫爲浦江鄭大和書
溪舊號香巖在縣東二十八里白麟則大和二十六世祖
之名也有惠淮者字季淵實白麟十九世孫由遂安遷溪
上易以今名示有先也淮之孫綺至大和凡六世大和從
子鑑至某又三世皆同居共財朝廷表爲孝義門嗚呼溪
流無終時公特書是以寵之者蓋將勗其門相爲悠久哉
歐陽文公集

卷十四題

五

字畫方毅酷類顏真卿觀者孰不改容不待贊也

題太師右丞相畫墨竹

右墨竹一枝太師右丞相所畫以遺其館客授經郎鄭浚
常者也丞相天姿明睿知識過人一日得文與可竹譜學
之卽臻其妙觀其枝葉面嚮柯幹節脉皆與可法而筆意
老蒼與近代李蘄邱諸人所作迥然不同浚常在相府直
言不阿又多引拔善類爲長史甚得體相君雅愛重之故
授以心畫云

跋

跋遠林劉君墓銘後

前代士大夫非居憂人不敢以銘墓請非此則奉勅或契友族屬尊行與座主舉主也今常博劉君文廷制中作遠林劉君墓銘文字簡古又得古式故特表而出之

跋王大年詩帙

予從王實初先生得其族孫德生詩賦一帙讀之翩翩然渥洼奇駿筋骨壯肆其馳騁未有絕極也他日範以王良造父之法納之和鸞大輅之下則才氣老矣三復題而歸其帙

歐陽文公集

卷十四

六

跋劉士行墓誌銘

廬陵處士劉士行甫以經學名家曩予在京師國學進士解子元嘗請序其詩文矣今其弟解觀又以邵菴虞公所爲墓銘求予跋夫廬陵九老以忠節文章顯國史書之天下宗之士行讀其書誦其詩論世尙友顧非斯人之徒與抑邵菴之銘至矣予奚庸贅

跋羅孺文族祖澗谷先生留藁

至正壬午十一月予訪族至鈴岡之防里縣大夫浚儀趙侯尙之因休日特來勞旣而又專其館賓羅君孺文與其子璉求鈴岡題名記等作時予又之別族之安成孺文踪

跡予所至暇日敬問其先世則先輩澗谷先生之從諸孫也先生分教長沙時先尚書澹軒先生居郡泮前廡道同志合友誼彌篤旣去官書問不絕咸淳甲戌先冀公以混試補入國學先生時爲權院留臨安貽書相慶以爲先尚書宣力學校之報內附後猶數有書於是予與孺文叙先世通家之好聚首數日驩甚將別出先生長沙藁一帙示予帙中或手自抄或筆吏錄朱墨如新皆所點校歛衽讀之如從先世與先生游詠碧湘翠麓間也獨詢其適傳則有如往時湘中之所傳者使人不能不係之以感慨士大夫寓形天地可託者二曰有文二曰有後二者未必得兼不歐陽文公集

卷十四

七

得已而去則有文庶無憾也

跋歐陽文忠公墨跡

元生平所見竟國文忠公真蹟甚多其篇帙大者於同年許安陽家見毘陵胡文恭公墓銘藁百丈輝上人所見州郡名急就章胡氏碑行草急就章皆微涉行楷余家所藏佳者曰與杜祁公蘇明允書及晚年三乞致仕表草皆筆法如一獨祁公書端謹結體頗若蘇氏父子豈非蘇氏感公之至初年做公之書後充拓自爲一家體耶茲來叙族至早禾田歐氏見集古題名碑跋而歐氏在楓樹下者又出與留守學士書見示皆名筆也第書中貺字兩用雖貺

况古文通然意若有所謂留守學士者得非田元均乎旅寓乏文字考訂姑識此說以俟博古之君子

跋眉壽二大字

至正丁酉九月浦陽鄭深浚常由吏部員外郎除浙西僉憲將行自念先爲授經郎學在內府密邇青坊常獲侍皇太子視席今日遠役誼當入辭乃因宮臣以見既詢其南歸之由對曰老母年近八十思便侍養是以遠涉鯨波不敢憚勞也儲君惻然顧左右取近日所書眉壽二大字賜之蓋以高其親之年庶以承其子之養也敬惟皇太子天廸仁孝之性於茲一事二美備焉仁事親之實孝爲仁之

歐陽文公集

卷十四

跋

八

本皇太子平日視膳問安盡其愛敬之道於三宮冀以寧君親之心說君親之志以勸君之壽也一旦推其錫類之盛心成已成物之功仁與孝不可勝用矣眉壽始見於豳風之七月老人眉有毫壽之徵也後屢見於魯頌之閟宮今鄭氏在浙東九世同纛旌表孝義之家也部使者興化美俗之官深於斯行奉元良心畫以歸心法之正大筆法之端嚴焜耀山川新民觀瞻於是稱幽雅之兗觥效幽人壽君之敬而竭其忠賦魯頌之駘背保魯侯壽母之樂而遂其孝繼今鄭氏忠孝之祚日熾而日昌其光在此也深屬元述其實謹書之下方云

跋先冀公沁園春詞

元生日先石冀郡公作此示勉被跋於後

元子來前還憶汝今朝初度時是吾家幾世書香闕
閱我翁疇昔心地坦夷宅相伊何泛紅老子汝母慈
仁喜有兒如今恨倚門人去和膽爲誰丈夫七十何
爲算三十功名已是遲要經天緯地拓開實用嘲風
弄月省可虛詞我亦平生卮言徒費猶酌檐花向九
疑團欒好待老吾泉石留汝鍾彝

大德丁未元賤生之日先公祝之沁園春詞元受而藏之
第年少家貧性亦疎散房中惟有一敗篋以繩約之篋中
無所有又以紙外護之甚嚴暇日時復展玩明年戊申不
歐陽文公集

卷十四

跋

九

幸先公棄捐自是見輒嗚咽殆不忍觀皇慶壬子元免先
公喪又二年矣先公在時所定謝氏歲久不克成婚繼妣
長沙郡君謀爲元畢婚姻而元方游湘中繼妣老妮啟元
篋取故衣浣濯補紉以俟新婚老妮目不知書篋中文字
亦爲所持去此詞亦在焉元歸而求之竟失其所遍索十
數日無得深自刻責以爲不能寶藏先人之訓遂爲此生
抱恨之大端每至劬勞之日則泣而識之如是二十五年
屢嘗籲之先公冀陰相之庶幾復見此詞以無負付囑之
意延祐乙卯以來元僥倖科第歷官中外至元元年乙亥
叨恩翰林直學士國子祭酒先公贈翰林直學士亞中大

夫輕車都尉追封渤海郡侯尋蒙奎章近臣奏請有旨申
勅詞臣製碑以賜元感激之餘付書還家囑舍弟信翁先
白於禰告祭之日諸昆弟子姪咸集中堂姪進老遠前曰
昨日偶洽故書得先祖手澤一紙蠟食殆半乃壽八翁沁
園春也兄弟相視大驚曰此汝叔平時徧求而不得者汝
何得此衆取視之果然卽付書報元京師二年丙子夏謁
告南歸立碑甫抵舍姪卽以詞見遺元奉詞涕泣如隋珠
和璧去而復還自計生平可喜之事未有過此嗚呼異哉
詞所謂宅相伊何泛紅老子者謂外大父臨賀府判理齋
李公也倚門人去和膽爲誰者是歲免先夫人喪也嘲風

歐陽文公集

卷十四

跋

十

弄月省可虛詞者元少作頗患多故先公以實學勗之也
猶酌檐花向九疑者先公分教春陵時將之官也雖然元
之至喜者以此詞之失而驟得則先公若有陰相之也他
日或可道伯魯授簡之責也其至懼者則以先公期待之
意如彼而元之疎文謏學所成就若此其何以道伯符不
克負荷之譏乎裝潢旣完踪跡所至必攜以自隨三年丁
丑以侍講學士召入京戊寅春以二品恩劄申請夏五月
進贈中奉大夫湖廣等處行中書省參知政事護軍追封
冀郡公先妣追封冀郡夫人六月甲申祭禮畢因出此卷
再寫善本并致所感云男元泣血書於賢良坊寓舍

跋先冀公與南谷先生書

先冀公與南谷居士未及一識族中宜翁爲之求書於安
福同知王君習齋未幾習齋去官故未及投留之篋筭考
其歲月蓋大德丙午丁未間書則元爲子弟時代先公作
者也至正壬午十一月元叙族至防里俯仰將四十年南
谷先公卽世皆久兩家子弟覽之愴然

跋桂里家藏六一公遺墨錄本 增入

六一公集古錄跋乃其生平留意之作本一遊戲之字而
寓鑒戒辯邪正往往凜然有不可犯之色此帖字畫清適
公嘗自謂得李北海佳處蓋不以形似而以格力也善評
書者能言之

歐陽文公集

卷十四

跋

十一

歐陽文公圭齋集卷十四終

歐陽文公圭齋集卷十五

廬陵鈞源族裔孫

杰芝田
棻介卿校刊

贊

御書九霄贊

聖人居潛如日未旦待其將出光景於粲若木蟠桃實生
海濱天光首被先萬物春離麗正中烜赫八表物物容納
莫獲私照上在桂林臣有震宣躬荷寵顧染翰賜之迨其
踐阼億兆悉臣欲攬天章幾千萬人向所蒙恩曠遇希世
隋珠和璧曷足言異今雖近臣孰敢奏請仰瞻雲漢惟有
引領日邊之氣其名曰霄陽數用九潛德孔昭龍飛之徵
歐陽文公集

卷十五

贊

一

有開必先形諸翰墨夫豈偶然天啟淵衷神助筆力震書
乾初洞見天則猗嗟震宣世世寶藏億載萬年爲龍爲光
麟鳳二大字贊

皇太子習大書端本堂上命度其所書記之於籍或以賜
近侍宮臣則錄所賜人姓名而登載之慎重之至也宣文
閣授經郎浦江鄭深其官署旣在內府與青坊密邇深家
又以九世同居聞自諭德以下咸樂與之遊因得侍硯席
被寵顧故有是賜焉所賜爲麟鳳二大字若曰同居爲國
家之瑞有若麟鳳云爾筆法方嚴意度閒暇天縱不凡深
得之允爲慶幸囑元記其事於下方謹拜手作贊辭曰春

宮臨池神助腕力結體楷嚴運筆端直上命宮臣以時貯
儲遇有賜予籍而記諸深仕延閣授徒宮庠獲陪燕翼膺
是寵光維麟與鳳肇錫孔嘉有之似之瑞我國家

潘雲谷墨贊

徂徠松雲貯元谷道人居中抱其獨琅琅空山萬杵熟道
人奕然開電目松雲化石石化玉崢嶸寶氣霄漢燭貢之
奎章藏在櫝龍光淋漓九宇福

十八羅漢畫像贊

我觀應真玲瓏入牕具妙用故示諸愚蠢世言神通自墮
幻隗匪梵匪漢匪奇匪厖見師卽呵孰前搏控千花冥冥

歐陽文公集

卷十五

贊

二

百泉淙淙猿吟鶴飛白雲空控龍伯山君巴滇蜀駝爪剛
力犴冠詭服龐或象瑜來或於菟降信攝平等詎分玳玳
如來在時慧日萬邦旣入涅槃俄然膏釘固修第二有二
無雙矧此苦海實資徒杠南浮諸方金鼓肆擬建論性相
樹茲疑幢彼不見月指月在江渟爲泓洄激爲湍瀧我無
成虧喧寂一腔

此歐陽先生閒暇時着意爲仲賓題此廿韻仲賓避亂
客固江黃氏子魯所因以遺之識者當因文以重其畫
不可因畫而泛觀其文也馮翼翁子羽觀跋

充國文忠公像贊

文在兩間與世推移道之將興文必先知八代委靡韓歐
繼作讀者瞻之實啟濂洛五季鉅筆素王微權本論拳拳
慶歷七篇人心既正士習斯淳黃河泰華我公其人

族兄山村先生像贊

字源清

實踐真修洙泗之學濶視雅操箕穎之風節用謹身充而
達乎曾閔之行存心養性悟而超乎松喬之宗子孫極高
年之養而志存舊日之儉素鄉邨推丈人之行而身教後
生以謙冲郡侯賜帛重於鄉飲朝廷表門侈於素封是宜
濟南諸生追懷九十之伏勝襄陽過客瞻仰百世之龐公

族子秉彜像贊

山村子也

歐陽文公集

卷十五贊

三

以治官之能治家以應世之智應族不遺履舄任用咸當
不勞鞭算貲具自足心平而直何事城府行簡而易豈資
邊幅有子孫之賢可悅情性有山林之勝可娛心目人見
其康健而期爲山村向上之壽我觀其忠厚而知爲歐門
鼎盛之福與

靜修先生畫像贊

先生姓劉名因字夢吉容城人至
元中蒙裕宗召爲贊善辟集賢學

士皆
不拜

微點之狂而有沂上風雩之樂資由之勇而無北鄙鼓瑟
之聲於裕皇之仁而見不可留之四皓以世祖之畧而遇
不能致之兩生嗚呼麒麟鳳凰固宇內之不常有也然一

鳴而六典作一出而春秋成則其志不欲遺世而獨往也
明矣亦將從周公孔子之後爲往聖繼絕學爲萬世開太
平者耶

默安先生畫像贊

東平安氏

寤寐乎明善誠身之書步趨乎格物致知之學關西三鱣
未必榮於教授之四世荀氏又龍溪以過於伯仲之一壑
豈非自茅作而忠信著元酒淳而嗜慾薄者乎鍾期伯牙
有同世而不相遇者吾故於默安之神交而益以重容城
之先覺也

咸如蘇先生畫像贊

歐陽文公集

卷十五贊

四

英英紫芝皎皎素絲冥搜遠討默識近思子雲精深季海
孝友德人之容君子之守

郎中蘇公畫像贊

維子寧父爲名卿士其心塞淵如古君子旣合於古誰諧
於時職是正直弗究厥施居家簡牘在國諤諤屹如長松
矯如一鶚蚤以讜言屢忤權相晚著惠愛足食邊饗剛者
必仁仁必有後宜爾有子簡自造秀遺像儼然不亡者存
九京可作孰敢吏雲

曾文迪像贊

先生之學吾誰與稽吾有源委澗瀝東西先生之書吾讀

未遑吾有徵信季通紫陽大道無形公獨有像神仙不死
公獨有葬葬留仙訣像馭仙風止乎觀邱池水澄融魂月
魄水息慮良止鶴鳴長空騰化震起遺鈴記傳嚴密謹言
感發人心何日已焉

防里族姪友人劉伯常名夔贊

劉氏奕世以更著號何事於更一變至道不變者存於其
保之字子以常名子以夔

陽明軒大元子龍贊

閻闔開蜿蜒回寶劍出天馬來

元教宗師吳公畫像贊

有序
增入

歐陽文公集

卷十五

贊

五

至正中世祖皇帝常命公主祠衡岳後留朝屢使
過之必躡飛景於層巔覽浴曦於遠海作衡岳像

江漢兮揚舫洞庭兮飲馬消搖乎天柱之上游冥乎紫蓋
之下坐碧巖以忘年蔭長松以清夏朱草產乎離明壽星
見乎軫野爲世治之禎祥宜天錫之純嘏接飛霞於十洲
賓出日於半夜公侯造膝猿鶴不避王人薦璧雲月爲籍
以予觀是翁識鑑邃者疑於神光塵同者鄰於化使之端
委廟堂則范長生之風軌若夫山中宰相固陶宏景之流
亞也

募疏

寶雲禪寺題疏

唐會仰小釋迦上形禪師作雙峰禪寺於石鎖峰下迄今稱名刹座席多叢林望士至則咸有所樹建舊殿僧堂作者爲別傳泓法堂爲晦谷輝鍾樓爲夢作滿南廡文室爲近年謙山福今堂頭一清徹公克武前修仰瞻佛殿屋老思撤之揣力弗贍以予舊家宜陽寺邇吾族求作儷語發端鉅家冀獲資助圖維厥新詞曰

唐刹占山水之奇舊多勝迹瞿曇備天人之福必有廣居惟茲寶雲雄我鈐邑翬飛傍峙已聳巖瞻象馭中臨未崇歐陽文公集卷十五疏六

殿制茲欲哀多益寡舍舊圖新卽蕪陋以徵辭謁華腴而求助於是講遺規於娑馭證妙境於率陀長者布金祇園咄嗟集事老人懸車故里讚詠成功故疏

簡啟

與所性姪

自夏謁告詞垣道假江左取便欲經祖郡省墓譜亭之行途中暑劇足與心違抵家以來且人事蠶叢文債日生遠辱慰問但卑叔在朝自忝從臣未罄黼黻之報恩及二代兼蒙賜碑榮幸不勝今遣老僕李特賁勅賜碑一本相奉別致薄贖贈諸族屬煩吾姪分俵勿患其寡而患其有未至也邇者賤疾百病交攻使者復促上道起居未可自必老僕卽使之歸似難稽召命舟中欲使任其扶持之勞家兄而次電此致問不宣

歐陽文公集

卷十五

簡啟

七

答意山先生

意山聘君老兄文侍元去冬防里彌月之留涵濡道德之味於骨肉之情得於兄所教良多迨今銘感未已令郎來辱惠問勲懇第憾溢美辭多令人讀之赧然賤跡自正月中旬以來右膝痲腫其痛如剗始者護痛不敢屈伸久之兩足拘攣卽日行立俱廢稽延召命恐違官箴遂援年雖未及身委有病自願致仕者聽之例移文有司行達朝省冀此庶得藥裹專心然亦沈痼如舊書來所謂促裝上道那得許事耶令郎初至適值病體服宣利之藥遂致泄瀉不已困憊不能見客數日稍復當圖報深愧莫能效毫髮

之助聞張毅甫尚書除江右憲使其人相知力疾作一書
干之或能相汲引一試也側聞今歲垂帳仍在舊館郡泮
必時至彼諸生常得親炙老成亦幸事也餘惟萬萬自愛
占答崖畧不敵先施等干尊照不宣

又與意山先生

元壬午譜亭之別於今六年都下蒙惠書但送書人乘便
卽行往往不別而去不及報書爲歉方馳仰間令郎至薦
辱佳翰承寓居春台壽履康裕殊慰殊慰文集舊序如戒
更寫令郎所著易問辨甚佳已爲作序第媿病餘意緒不
佳乏好語也令郎氣宇明爽因推其八字非常發達行當
歐陽文公集 卷十五 簡啟 八

擢科吾兄取義方之效享榮養之祿計日可待也劣弟蹒
跚如昨右臂時苦風氣流注大爲所窘最是文債日生無
少休息令人悶悶未卜會期惟以道珍齋草草伏希尊照
不備

答所中

猶是癸卯叙譜以來今三十有五年矣是時不肖與所中
俱在子弟之列每思幼從兄弟之樂今復欲爾尙可得耶
去夏謁告詞垣假道江浙初意徑趨洪袁一訪故里中途
劇暑遂與願違老僕還聞族中諸公相候甚久令人慚慙
無已茲遠席宗庇自忝從臣恩及二代兼蒙賜碑尤出望

外受寵驚懼蒙書乃以賀言惟重怵惕祖塋題表之喻僕何敢當第曩歲侍親春陵見元公家數世之墓皆太守方孚若爲題之他日援此故事或得一名筆表識亦未晚也賤迹近叨兩召貧病交窘居行未知攸措吾姪何以告之宜翁還專此占復潦畧等幾字照

答所立

相距五百里相別十五年逆旅倚伏靡不更常起居動靜邈焉無從忽宜翁兄攜所惠書得之驚喜相半追憶曩侍先君子琴冊適執事自綵侍來以拜見退相從齋閣是時僕與執事俱爲人子弟一門自爲師友之樂有不啻喻今

歐陽文公集

卷十五 簡啟

九

曰此况此味惟屬之所立仰惟名門雍熙之軌翁季道德之盛異時秋蟬賦側耳獨領畧吾知叔弼久矣兩科士論殊以魯生不來爲憾六月之息三年之鳴端有所待他日榜中龍虎第一相承舍君其誰政當堅坐冲密守庚申耳區區遭時承乏何足置牙頰來書諄諄然及之令人卷舒媿瀦可拾甚者以六一爲比是何以美疾強加我耶此公事業未論其他只蘆荻畫地我輩曾受此苦曾下此工夫否此則斷斷然不夢見脚板者也廬陵長沙之議不謂茲事亦微聽聞僕在二郡不翅滄海一稊或者之語僕亦不辨惟應之曰僕爲崇韜不敢籍談尤不敢也不改布素一

語亦告者過番羶瘦馬自是鄧億家風且先輩三尺森嚴
在前何敢猖獗一步寄示畫軸皆米家虹月惜蕪穢不足
發揮歲晏百冗填委宜翁行又遽尊翁朝奉令叔意山學
士令弟芳茂暨族黨諸先達皆不及尚狀敢告申敬何時
譜亭叙拜以罄鄙懷家兄而次附致謝臆等幾魁照不宣

答劉申齋先生

元頓首再拜復書提舉聘君申齋先生丈席元卽辰清和
承體候佳勝濟南耆年有相之道不勝願見之禱吾宗振
先來辱書且知姪孫宗任客臘參謁座下第緘寄雄文迨
今未至不審何故亟稱督索端便復命隴阡樵採之禁事
歐陽文公集 卷十五 簡啟 十
出當然流言之惑實無是也區區抱病三載始獲一歸心
志凋殘舊學如失其不能爲先正大夫役也審矣適候卜
氏女病振先就之相見借紙占酬凡百潦畧惟鼎茵加步
以壽斯文謹奉狀不宣

答劉桂隱

元頓首再拜復書桂隱先生執事元視廬陵江鄉乃未獲
一寓桑梓之敬諸鄉先生亦未嘗一望履絢虛名誤人僕
僕南北抱茲二欠負負奚文先生道德之重藻鑑之明今
先之以書且有文集叙之諭僕何足以叙高文之後此亦
虛名誤聽聞耳踵龔訛謬如是不已豈不甚可畏哉僕自

去春痺疾盛作一歲之中謁告十九今者又有異子之戚
俵俵南歸予環之使要諸路上夏初誤恩落侍講升學士
俯僂循牆迨今未敢拜命心常忤忤舊學廢忘仲賓還姑
爾塞責滓穢高明知罪知愧盛暑力疾治答不敵先施切
希照亮

答孫春洲

元顛首再拜上記春洲聘君先生元讀天台賦金聲嫋嫋
吾耳將二十年識公於此蓋久昔人識心在識面之前斯
謂知己族弟志行家人至辱佳翰勞問勤懇殊慰瞻馳第
玉署再遷之言此傳說者之謬幸勿過聽區區抱疴三年
歐陽文公集 卷十五 簡啟 十一
朝廷熟察而深憐之譬之病駒不任銜勒置之茂林豐草
之地使之姑遂其本性豈有復可驅策者哉令郎才俊自
當不乏知遇萬一邂逅在他人尙能推轂豈敢愛一援手
之力於秦晉之戚哉价旋力疾占答秋杪冬初必到防里
胥晤有日餘儲面賦草畧希照察不宣

又

元顛首再拜春洲先生契友元臯在史館與曼碩揭公談
江右人物揭稱譽足下才美在臨川孫履常何太虛間會
見咄咄逼人他日相知翰墨中益見故人藻鑑之高日者
敝族諸子弟見過又知結習斯文固有瓜葛第恨才薄資

淺仰慕前修薦士不得彷彿其萬一耳所求春洲詩及大字草草塞責報章遠勝作者子昂墨蘭自是佳品感媿無斃區區劇暑抱病越便裁答不敵先施尙幾照察不宣

與張憲使

都門別後賤迹尋亦謁告還湘相距地遠之便致書惟深馳仰近傳至除目共諗移輶左浙弭節西江西江之民蘇息之期實在此矣僕先世西江人也里中長老時相往來語及公來相與喜抃少自僕近訪族族中少俊甚多有姪原春者其才足以應舉然得失未可必袁州路學薦爲直學例必經憲司試驗欲望相公賜一援手之力他日寸進實出陶鎔何敢忘也賤體入春以來痺疾愈甚兩足拘攣行立俱廢雖被召命自度病勢如此未見卽愈自願休致之章已達有司每日從事藥裹而已爲况無足爲知已道者舍姪行顓此起居未中冀順序珍賻行膺柄用不具備

慰劉國博喪母

元顓首奉慰文廷博士至孝元不意慶門倚伏之會先太夫人奄棄榮養緬維哀痛奈何元聞變不勝慘怛已僦小車詣行府申唁昨暮適苦痰嗽鬱眩之症又聞車行甚急勢難面會中統若干聊爲僱車之資道遠冀節哀順變以襄大事手疏潦畧不具

與劉文廷

元手書再拜上文廷博士提學相公仁友元往夏去國同
列中以不獲一言以別爲憾客冬還鄉久之又以不蒙一
紙之寄爲欠今夏忽覩除目承有儒臺之擢旣喜且駭其
喜則以國初甚重此職覃懷許公由是拜左轄亦愚葉公
由是拜右轄大德中吳興趙公由是入爲待講吾文廷居
之允愜士論其駭則以跡離翰苑時當揆力勉其留其言
以爲斯文漸覺人少僕抗言薦數士爲代如文廷皆其列
也當揆蓋嘗諾之今忽外補非文廷求出必不爾也已而
果傳有子夏之戚聞之胸次作惡者數日昔有三人聞客

歐陽文公集

卷十五

簡啟

三

言虎患一人蹙額大甚僕其人也才不才亦各言其子行
年嘗以此致心疾後來熟思之理數自然皆有乘除修短
存乎其間暮年盡傷亦復何濟不若姑聽造物所以與我
者何如耳劉仲賓行亟此代面外有一啟極知剩出或可
助發一莞聊以寬君之憂也僕態勝舊近又苦痰暈之疾
但夙緣無涯竟日爲人造綺語業殊可厭也毫楮草希照
亮

與劉文廷啟

茲諭輟班學省進秩文臺晨入都堂陳衷懷而求去晝歸
六館別同舍以治行綸綍及門輻軒在路旣許卽家而爲

府又容需次以申情仕宦以稱職爲稱心宜無內外重輕之辨賢達惟知義故知命自明禍福倚伏之機故於趨賀之緘輒爲譬解之語孔文舉揚德祖古人所親卽兒羨門子浮邱公今世未聞有後首尾不嫌於衡決肺肝所託於深知髦髦馳忱怒怒闖便

回有壬許參政啟

辱示謙鳴喜新賁治包胥感無衣之賦竟償復楚之言相如獲全璧之歸始著却秦之勇蓋人之秉忠者必遂而物之拂性者終還追惟往事之堪驚益懷高位之難處文場有議豈容居西掖而弗知丹詔驟頒乃獨使東廳而恭聽

歐陽文公集

卷十五 簡啟

古

此挾姦回之秘策欲摧俊乂之前茅尋移疾以去官姑待時而俟命生意已存於碩果大材寧繫於匏瓜皇天實鑒乎臣衷聖主自定乎國是予環鶴渚公曰盍歸乎來哉授柄鳳池忽謂兆足以行矣屬開端於更化嘗效力於代言然非烏獲莫勝曷克絳侯見阻急迂輶軒而傾蓋直同章布以彈冠洎僉黃髮之謀親預絲章之寫於是退前日掩奎之宿卽當時押角之人嘉與賢能獨洵周家選舉之法至詒朋友共播虞廷賡歌之音第愧疎庸莫陪揚厲王通受罔極之賜惟乞閒身孟明收再效之功當書逸史亟酬先施倍切懽悰

祝告文

上尊號祀列聖祝文

天昇寶命列聖相承貽萬世之丕基輯九圍之至治顧茲
菲德嗣求基圖念皇考之上賓結孝思之罔極爰舉徽稱
之典躬陳時祝之儀尙冀垂歆敷錫祚允

明宗皇帝耐廟祝文

於穆皇考聖德配天何臨御之弗遐儼威靈之如在顧茲
冲眇嗣守皇圖惕惟丕訓之承祇奉鴻名之舉是用躬執
圭瓚薦其苾芬仰惟願懷來格來享

焚黃祝文

歐陽文公集

卷十五

祝告文

五

維至元三年歲在丁丑二月朔壬申越十三日甲申孝孫
翰林直學士國子祭酒元敢昭告於祖考贈中順大夫中
書禮部侍郎上騎都尉追封渤海郡伯澹軒先生歐陽公
元奉元統三年乙亥三月制書以元忝列藝文大監備位
三品推恩二代贈封祖考官職勲爵如右是年九月以書
到家告廟改題且尊彝式爲元尋遷太常翰苑等官限以
職守今者謁假來歸告墓之典始克成禮惟我祖考懿行
粹文師表湘楚推誠淑人惠利後學儒者之德莫盛於茲
餘慶所被施於諸孫獲承國恩致有褒贈思昔咸淳甲戌
鼓篋上庠其在當時六館諸生爲厥父母咸得推恩世運

遷移先考齋志六十年間歲運一周積善之報久而彌彰
有若此者侍郎法從之官貴列入座渤海大郡之壤崇視
徹侯載燔密章昭侈上賜伏惟膺此寵光濬厥福澤庇賴
我後益熾以昌謹以牲齊穀饌式申虔告

焚黃告后土文

維至元三年歲在丁丑二月壬申朔越十有三日甲申翰
林直學士中順大夫知制誥同修國史國子祭酒歐陽元
敢昭告於官榮橋白雲菴后土之神元欽奉制書贈封祖
考中順大夫中書禮部侍郎上騎都尉追封渤海郡伯爰
擇吉旦燎黃於瑩惟神苞流崇深穎擢明秀相我先祖爰
歐陽文公集 卷十五 祝告文 六
靈於茲庇厥後人本固枝茂實惟神庥惠徼方增報祝敢
後自今以始恩休數至惟爾明神宜有榮耀尚圖利之謹
以酒穀庶饑設申虔告

防里祭祖祝文

大元至正二年歲在壬午十一月己巳朔越十有三日辛
巳曾孫翰林學士資善大夫知制誥同修國史元謹以牲
酒之奠致祭於防里第十一代祖七承事府君歐陽公墓
前而言曰禮去鄉國省墓而行重違遠地先世遷瀏動踰
十紀井邑旣殊歲月旣久踈迹松檟事勢使然餘澤所覃
靡聞彼此元自竊科第登公朝備列法從推厥本原敢昧

所自謁告來歸展省墓下追懷雨露怵惕深增惟我先祖
流慶後昆願自今始無曠爨禮尙享

防里始祖祝文

防里歐陽氏始遷第一代祖府君墓前人本乎祖百世匪
遙精神旁通體魄如在遠孫席庇展省還鄉萬木一春萬
水一清豐本濬源用永慶譽惟我先祖實克相之

告后土文二

防里第十代祖墓后土氏之神先世遷瀏遠離墳墓曾孫
展禮宅覲以固祖考來歆神亦惠顧濬靈鍾奇錫我蕃祚
我後既惇百世無斃尙享

歐陽文公集

卷十五

祝告文

七

防里歐陽氏始遷祖墓后土氏之神自吉之袁我祖始遷
妥靈茲阡今三百年高山蜿蜒其上隆然神相我後慶流
如川

祭文

翰林國史院祭揭侍講文

嗚呼公之道德忠厚篤實洞徹内外公之文章純深爾雅
警發憤憤方館閣之踐敷實昌期之際會密勿論思從容
進退當譽望之日隆惟恪恭之致戒掌斯文於玉堂贊皇
猷之光大侍講讀之經幄知啟沃之切闈特引年而挂冠
戒舟楫而南邁帝錫命而來還冀黃髮之未艾邇前聞之
方殷思竟考夫前代詔總裁於三史庶緝熙於帝載天不
憖遺慨其殄粹惟我同僚思其莫再望望喪車悠悠丹旆
尙期英爽歎此薄醑

歐陽文公集

卷十五

祭文

六

祭子達老文

至正元年歲次辛巳二月十一日父老八翁卽大都崇仁
門之寶泉寺爲特舉羊酒殺之奠告汝十二郎上舍之靈
曰嗚呼哀哉尊者哭卑者而哭於暮年生者送死者而送
於異鄉天下之慟有甚於斯乎吾年五十餘而無子也旣
以汝爲子矣凡吾老身之侍奉後日之繼承惟汝是賴一
旦而失所望焉天乎人乎孰使老父罹此毒乎以子之學
可受萬祿以子之孝宜享壽齡天乎人乎孰使吾子至此
極乎丁丑之秋赴召北來汝伯伯汝叔送吾與汝他日吾還
汝獨何往吾亦何面目見汝伯伯汝叔乎汝之生父吾之愛

弟也久矣抱疴遂廢宦業今聞汝訃遠數千里其將何以爲懷乎爲之兄者又將何以堪此情乎且汝之病吾謁之醫而竭之劑汝之歛吾致之襚而哭之痛猶以爲有憾也吾弟於汝其病也不見所服之劑其歛也不見所襚之衣將何以釋其憾乎吾於汝身虧顧復之義失父道矣又於吾弟垂付託之意失兄道矣二者胥失其將何以逃於天地之間乎吾才不逾今之中人吾學不及古之下士祿寵踰涯不自乏絕覺鍾後人致汝天闕今雖知過其可及乎去年送汝先至通州汝柩發後有詔止之留汝一年不遣行者欲送汝也今茲將行詔又止之其敢違乎勢難再留

歐陽文公集

卷十五

祭文

九

計無從出專遣幹僕托之信友扶汝護汝先還家山昔汝孝行感於神明生不獲祐死當蒙休汝登舟車無震無驚汝涉江湖無恐無怖魂神清明依汝體魄吾今抱病逾二載矣其哭汝也淚盡而筋枯血澆而心悸虛名禁持無所告訴上天監臨終遂所請歸治汝喪歸立汝後庶幾周吾父子之情塞吾兄弟之責也汝其有知強飲強食往卽長路以還故鄉其無以老父留此爲念嗚呼人世之別有慘於此者乎老父之哀其可已乎其不可已乎

歐陽文公圭齋集卷十五終

歐陽文公圭齋集附錄

廬陵鈞源族裔孫杰芝田校刊

神道碑

元勅賜翰林直學士亞中大夫輕車都尉追封渤海郡侯歐陽公神道碑銘

翰林侍講學士通奉大夫知制誥同修國史知經筵事臣張起巖奉勅撰

奎章閣學士院侍書學士中奉大夫同知經筵事臣夔夔奉勅書

歐陽文公集

附錄

神道碑

師簡奉勅篆額

今皇上卽位之三年至元改元冬十一月三十日奎章閣大學士臣沙臘班奏翰林直學士臣元職翰林論思有勞制贈其考官三品爵列侯欲著之碑銘光侈上恩其勅翰林臣起巖撰文奎章閣臣夔夔書丹臣師簡篆額上曰可臣起巖承詔伏惟延祐初年仁宗聖文欽孝皇帝繼述祖訓建立科舉大廷策士臣元臣起巖賜第拜官爲同年皇上御極簡擢侍從臣元臣起巖代言紳史爲同官明詔諭臣俾揚其先烈發其潛德求之臣職揆之友誼皆不敢辭謹按公諱龍生字成叔歐陽氏其先冀之渤海人從晉南

渡徙長沙率更令詢以文學顯名隋唐四世孫琮爲吉州刺史因家廬陵琮八世孫萬爲安福令故又有居安福者安福府君而下四世曰效三子謨託諡託徙吉水後吉水析置永豐傳三世是爲宋太師克國文忠公之考崇國公其他子孫散處安福邑境雍熙初割安福置分宜縣隸宜春郡故居安福永豐者籍廬陵居分宜防里者籍宜春而安福分宜地相去不滿五十里公防里族也別號防里歐陽氏曾祖安時及祖新皆漕試湖南愛瀏陽山水之勝又徙居焉新字仲齋以經學著稱淳祐末荆溪吳公子良漕湖南辟廬陵歐陽巽齋守道爲嶽麓書院山長又以禮聘

歐陽文公集

附錄

神道碑

二

仲齋爲講書因寓長沙巽齋聆其講說嘆曰長沙自有仲齋吾何爲至於此考逢泰字忠叟經術行業師表一方學者常數百人擢科登第相屬也用薦爲潭學錄安撫司檄與湘潭譚景衡履學田堙沒者登故額士廩以羨廬陵羅子遠在教授席賴其佐助爲多今贈中順大夫禮部侍郎上騎都尉追封渤海郡伯妣何氏渤海郡君公年十六入潭學已負俊譽月試占高第相國古心江公判潭州帖爲崇禮齋長又二年從醴陵田氏受春秋三傳甲戌混試國學生湖南終場萬三千人有奇拔士二十八人公以春秋中第二肄業存心齋時羅教授爲朝官以書賀云勗潭學

田經界忠叟景衡盡心焉去歲景衡子魁鄉薦今年忠叟子入上庠造物報人不爽如此至元丙子內附侍禮部選瀏陽居霞陽山之白雲莊禮部晚歲究心太元作律歷統元圖書數十卷因耗心得渴疾公泣諫不爲止未脫藁卒公抱其遺書每慟哭至絕左丞崔公斌行省於潭召之以親老辭居山十有七年部使者至瀏瀏有文靖書院祠龜山楊先生淪廢於隣使者考郡志謀復其舊詢衆求才望士任斯責衆以公對乃專縣尹杜元忠卽山中延至會有司例試儒戶中選者復其身使者命公考士湘陰瀏陽去取公當人至今稱之憲部薦其才牒宣闡達之省府授文

歐陽文公集

附錄

神道碑

三

靖書院山長郡人強之起始受命改築書院猿啼山之陽踰年禮殿講堂門廡齋舍及龜山先生祠事內外具舉學者雲集書院廩稍不贍佐以己資夫人亦撤奩具助其經費落成之日升堂講孟子承三聖章言龜山先生傳程學而及豫章延平紫陽朱子實承道統斥王安石配享孔廟功亦可配孟子山林老儒聞書院之復筵講至爲出涕秩滿沿牒之京師贈太傅魯國康里文貞公野齋翰林李文正公抑菴集賢宋公文薦爲校書郎行就職矣會集賢言歐陽山長有功文靖書院今瀏陽陞中州例設教授師席初延須宿儒碩望啟迪來學宜移教其邦人便朝論是

之改瀏陽州儒學教授至則會學廩可膳二十人月約一十五日選俊秀補員會食躬親教督諸生皆勤勉自力科場旣闢進士輩出實公權輿之遷道州路教授道介兩廣或以爲遠公曰茲爲周夫子之鄉何遠之有至官郡庠隣濂溪書院公定規約朔謁宣聖畢教授率諸生謁濂溪祠一日過祠東見老屋數間詢知爲西山精舍勝國時祠蔡季通蕪廢久矣祠舊隸郡庠有田百五十畝或利其入欲兼併之故以屋餽軍官去遂不治幸其速壞公立召僕夫拚除按籍得田修其祠郡學田多爲豪民據有公請諸憲司被檄往括暑行山間得租三百餘石因感疾歸卒官舍

歐陽文公集

附錄

神道碑

四

至大元年八月五日也年五十有七諸孤奉柩歸以三年十月三十日葬郡東羅田之木瓜埭公旣沒之七年當延祐甲寅元舉進士魁湖廣省貢明年乙卯以第三人賜第同知平江州遷蕪湖尹初贈公承事郎同知湘陰州事再贈朝列大夫同簽太常禮儀院事上騎都尉追封渤海郡伯今贈翰林直學士亞中大夫輕車都尉追封渤海郡侯初娶譚氏一年卒再娶李氏金陵仕族有婦德知書前公十年卒初追封宜人進封渤海郡君今封渤海郡夫人繼室李氏封長沙郡君李夫人有子曰浩龍川書院山長娶唐渤海郡君夫人有子五長貞孫石林書院山長娶王次

定孫曲阜林廟學錄娶李次元也今中奉大夫國子祭酒
依前翰林直學士知制誥同修國史娶謝封渤海郡夫人
次憲孫幼鞠外氏李沅陵縣學教諭娶湯季彭年舉明經
娶周女二長適武岡路教授卜天佑次適瑞州雲石務稅
使湯居恭孫男八長慶以教授借注建昌路樂石若巡檢
次暹邇遜達皆業儒女孫六曾孫男四曾孫女四公儀表
峻清瑩皙如玉有膽畧幹局性孝友幼歲嘗刲股肉以已
母疾兄士高蚤世撫其遺孤皆有成婚嫁必先兄子而後
及己子先疇悉推與之讀書目五行下八歲屬文十五下
筆萬言文雄渾有體裁學精敏有識趣尤長於講說義理

歐陽文公集

附錄

神道碑

五

每講篇出土傳誦之晚號雲莊有經學理窟雲莊講義及
所著文集傳於家歐陽氏世以文學名廬陵之族大顯於
宋矣宜春防里清門素業文行有傳至於禮部倡鳴經學
師道尊嚴表率多士公學爲通儒行爲士架宣勞庠序位
不滿德維持斯文克肩其任再世如一遺善後人是有良
嗣首擢巍科聲華奕然演論玉署黼黻帝猷追封二代有
位有土大書表隧恩賁歿存則公父子平昔鑽學術道之
報昭然四達而防里之族克昌以大將媲美於廬陵矣於
乎盛哉銘曰

惟歐陽氏廬陵別族有家瀏陽同出安福文忠相承魁然

大儒防里清門世德不孤操義風烈堅持允蹈服膺克繩
義方之教三代之英士生其時世其道德以恬以熙至行
應古鄉邦攸重士子景從如鳥歸鳳衛道育才再世一心
播擾百年有獲斯今綸章載頒秩登侯伯霑恩所生於渥
其澤大君賜命詞臣敬承撰名發潛匹休廬陵宣昭幽顯
帝仁若天垂世無垠可千萬年

歐陽氏家藏亞中大夫碑跋

右元楚國文公元爲翰林直學士時制贈其考成叔爲亞
中大夫追封渤海郡侯復命侍講學士張起巖爲文以表
其潛德此碑所由刻也按元史稱楚國文公歷官四十餘
年在朝之日殆四之三三任成均兩爲祭酒六入翰林三
拜承旨此碑作於至元元年之冬正順帝卽位之三年公
爲翰林承旨所給以贈封其二代之日也按公瀏陽人瀏
陽之族原於防里防里之族本平安福與宋文忠公同祖
故此碑述防里爲詳今防里之系有上舍歐陽鏞家藏是
本出以見示予因竊嘆曰盛哉歐陽氏文獻之足徵也前
有文忠公以文鳴於宋後有楚國公以文闡於元然二公
之所以廓大顯融者皆先世之積累仁厚所致也按文忠
公之考崇公爲綿州推官每夜治官書必秉燭而嘆凡囚
有可矜者必爲之求生此明刑慎罰之心也楚國之考重

中公爲文靖書院山長進職教授能羽翼道學修濂溪龜
山二書院經理學田以贍養士類此崇文衛道之功也其
積累仁厚皆如此宜乎生二大儒以清忠懿德輔佐宋元
昭一代之文明流百世之事業非偶然也其所以恩延先
世沒贈名爵追封公侯者非人之榮蓋天報之也予獲拜
觀爲追原本始綴一言於碑末俾繼是而觀者知二公之
所以光揚盛大者有先德爲之權輿非淺鮮之所能及也
詩曰毋念爾祖聿修厥德爲歐陽氏之後者曷之賜進士
朝議大夫加授大中大夫南京國子祭酒前翰林侍講同
修國史兼經筵官安成吳節與儉跋并書

歐陽文公集

附錄

碑跋

七

跋元贈亞中大夫歐陽公神道碑後

元歐陽圭齋先生元本分宜防里族寓居瀏陽登延祐乙
卯進士第歷官中外四十二年終翰林學士承旨文章道
德卓然名世朝廷寵眷終始甚隆加恩於其父祖者屢矣
方先生爲翰林直學士時制贈其父成叔翰林直學士亞
中大夫輕車都尉封渤海郡侯奎章閣大學士沙獵班爲
請命侍講學士張起巖譔碑文侍書學士礪巖書之起巖
與先生同年且同官故於碑中叙其族世行誼爲詳而此
本蓋當時摹之以遺防里之族者也防里之裔曰鋪裝潢
成帙將永藏之以爲家寶間來京師持以示予求跋予莊

誦再四見其家世文學之美行誼之高然後知先生之所
以顯融光大者有自信所謂積厚而發宏也不勝起敬焉
且是碑立於至元丙子迄今百二十六載而完好如新非
什襲而珍藏之其能至此歟然藏於家孰若藏諸身碑中
所載世可法也使爲宗族子孫者誠法其所爲心念而身
體之益淬礪乎文學敦篤乎行誼以求及乎前聞安知無
若先生其人者出以大顯於時哉昔六一翁以文鳴宋而
先生繼之固知繼先生而出者尙必有人信乎歐陽氏之
多賢也鏞字光樂爲國子生拜官且有日而才卓卓又今
防里族之翹然者其他子弟志學尤衆承先啟後庶其在
此因識於碑末併致期望之意云天順五年歲次辛巳冬
十月朔賜進士及第中憲大夫太常少卿兼翰林院學士
知制誥安成彭時跋

大元故翰林學士承旨光祿大夫知制誥兼修國史
圭齋先生歐陽公行狀

曾祖新贈中奉大夫嶺北湖南道宣慰使護軍追封冀
郡公

祖逢泰贈昭文館大學士資善大夫上護軍追封冀
郡公

父龍生宋大學上舍生累贈集賢大學士榮祿大夫上
柱國追封冀國公

公諱元字原功姓歐陽氏其先出於夏禹之苗裔漢涿郡
太守子孫有居冀州之渤海從晉南渡居長沙唐率更令
歐陽文公集

附錄

行狀

九

詢四世孫曰琮爲吉州刺史因家廬陵琮八世孫曰萬爲
安福令故有居安福者安福而下子孫散居境內宋割安
福置分宜縣隸宜春郡故居安福永豐者籍廬陵居分宜
防里者籍宜春而安福分宜相去不滿五十里公爲防里
族宣慰公試湖南轉運司愛瀏陽山水之勝遂卜居焉淳
祐末荆溪吳公子良將漕湖南辟廬陵歐陽公巽齋守道
爲嶽麓書院山長又聘宣慰公爲講書歐陽公聆其講說
爲之驚嘆昭文公經術行業師表一方若集賢公之行事
始終則有今上所賜碑備載云集賢公子四人長貞孫次
定孫次卽公季彭年公生於至元二十年癸未五月母冀

國夫人李氏賀州簽書判官廳公事某之女讀書能文親授孝經論語小學諸書公八歲已能成誦始從鄉先生張貫之授學日記數千言卽知屬文十歲有黃冠師至里塾坐定周視諸生注目視公久之曰是兒骨格不凡神氣凝遠耳白過面目光射人情本朝未興科目有則狀元何疑然異日亦當文章冠世聲名滿天下廊廟器也言旣而去亟追與語已失所之集賢公爲文靖書院山長部使者某至州謁之書院公與諸生講誦使者異之就坐命賦梅花詩立成十首晚歸增至百首使者謂集賢公曰令子奇才也年十四從宋進士方山李公某受業下筆輒千言年十

歐陽文公集

附錄 行狀

十

六歲從宋進士吾山鄧公某每試庠序必占高第老師宿儒讀公詞賦制科之文戒其子弟傳習焉弱冠下帷數年人莫見其面經史百家靡不研究伊洛諸儒源委尤所淹貫間至郡城憲使涿郡盧公摯見公儀表及觀所爲文大器重之相與倡和留連不遣去薦爲憲史力辭不就大德元年母李氏太夫人卒居喪哀毀致疾十有一年公生之日集賢公爲詞以壽之期待之意甚遠集賢公遷道州路儒學教授公實侍行道爲周元公鄉里儒風尤盛公自從諸先生遊學力銳進境內勝概題藻殆徧集賢公卒居喪毀瘠扶柩以還築室墓側居廬三年然後歸復還郡城江

東憲使蒙古孫公澤省親長沙一見大奇之留居舍館爲忘年友薦公文學堪居翰苑牒郡府以達朝廷雍郡虞公井齋汲分教於潭每見公所爲文爲之擊節時其子集爲國子助教繕寫成帙親題以寄於是公蹤跡未至京師而聲名已彰著於朝矣皇慶二年州之霞陽山宣慰公墓在焉前有方池水流清澗仲春之月兩偏有泉感沸其色正綠初出如綫凝結漸大如層雲疊翠浮泛水面日出生於西亭午至池心日入沈於東者三日汲而書於紙經久而色不變延祐元年季春之月芝草一莖七葉生於舍東桃樹猫犬樂相乳哺綠泉復見作三瑞堂以志其事會下詔

歐陽文公集

附錄

行狀

十一

設科取士公以治尙書與貢廬陵龍公仁夫爲考試官夢神馬見於雲霄書公姓名大旗上果以天馬賦中第一明年賜進士及第授承事郎岳州路同知平江州事四年丁繼母李氏憂六年調太平路蕪湖縣尹疑獄數起累年不能決公得其情皆爲平反豪右非法虐驅其奴公俾之從良貢賦徵發及時民樂趨事民有所爲皆曰縣尹聞之從無不可於意否莫不忖度而後行事飛蝗獨不入境嘉禾生野蠶熟成繭教化大行道不拾遺父老相率上其狀公立止之乃刻石吉祥僧舍行臺憲司交章薦揚泰定元年改承直郎武岡縣尹縣控制溪洞蠻獠雜居俗尙勇好鬪

撫字少乖事釁不測公視事踰月赤水大清兩洞聚衆相
攻殺隣境告變官曹相顧失色計無從出公曰彼亦人耳
欲弭其變惟以德化感之吾將躬行撫諭卽日單騎從二
人徑抵其地至則死傷盈道戰鬪未已獯人素知公德望
及至皆愕然相視棄兵仗羅拜馬首請罪曰我曹非不畏
法而擅興兵緣訴其事於縣不爲直吏更需求無已繇役
橫歛培克百端使終歲勞苦而無以爲生情有不堪發憤
就死耳不意煩我清官自來罪不可逃公乃宣布德威明
示信義歸理其訟其人感激遂安召爲國子博士四年考
試進士於禮部陞國子監丞致和元年授翰林待制奉議

歐陽文公集

附錄 行狀

十一

大夫兼國史院編修官會兵興承旨學士或有事役或留
上京一二同屬皆稱疾不出公領印攝院事日直內廷衆
決機務凡遠近調發制詔書檄旣而改元天歷郊廟建后
立儲肆赦之文皆經撰述且條時政數十事實封以聞多
推行之二年考大都鄉試初置奎章閣學士院又置藝文
監隸焉選清望之官中書擬翰林修撰某爲少監文宗不
允羣臣莫測其故久之乃問修撰品級對曰六品又問嚮
蕪湖歐陽縣尹有廉聲今安在對曰爲翰林待制又問待
制品級對曰五品曰何爲不擬待制而擬修撰耶卽取奏
目御書歐陽元可授藝文少監特命左丞相伯顏參政阿

榮傳旨公拜命入謝文宗大悅復問公曰汝爲廬陵族長沙族耶應對稱旨閱古今書畫或以宸翰賜羣臣必命爲叙贊至順元年考試進士於禮部奉詔纂修皇朝經世大典明年春書成奏御夏謁告南歸秋陞藝文大監檢校書籍事階朝散大夫是日中書奏遷不愜上意者去其大半既而特筆藝文少監歐陽元可陞大監除目今藏近臣家卽遣使召還今上卽位改中順大夫僉太常禮儀院事元統二年拜翰林直學士中憲大夫知制誥同修國史奉勅編修四朝實錄撰太皇太后玉冊文賜白金五十兩詔修先師充國公廟成奉勅撰碑文明年春兼國子祭酒進階

歐陽文公集

附錄

行狀

十三

中奉大夫召赴中都議事詔侍講學士張起巖撰公先塋碑至元二年得請還家監碑三年陞侍講學士中奉大夫知制誥同修國史遣編修郭嘉檢校張元先後各齋內醜特詔撰太皇太后玉冊文四年復兼國子祭酒進通奉大夫撰皇后玉冊文賜白金五十兩五年足患風痺乞南歸便醫有旨不允修曲阜宣聖廟成奉勅撰碑文初公有子皆早卒復以弟彭年之子達老爲嗣六年二月卒公哭之過哀舊疾復作乞還鄉里攜柩返葬近臣以聞上深念之卽日遣奎章閣典籤全普庵撒里賜內醜二尊追至臨清勉諭諄切不克辭復還拜翰林學士資善大夫知制誥同

修國史命馬札兒臺右丞相草詔懇辭去位降旨不允止免朝賀行禮至正改元更張朝政事有不便者集議廷中極言無隱科目之復沮者尤衆公力爭之命脫脫右丞相草詔九月南歸明年遣使賜白金五十兩金幣表裏段各一內醞二尊復起爲翰林學士以疾未行有勅譔故相和寧忠獻王脫脫神道碑三年詔修遼金宋三史遣使賜內醞二尊召爲總裁官使者迫促力疾就道至則廟堂問修史之要公曰是猶作室在於聚材擇匠聚材則先當購書擇匠則必遴選史官於是用公言遣使購書增設史官立三史凡例又爲便宜數十條俾論譔者有所據依史官中

歐陽文公集

附錄

行狀

古

有悻悻露才議論不公者公不以口舌爭俟其呈藁援筆竄正其論自定至於論贊表奏皆公屬筆南郊禮成冊文肆赦賜白金百兩居庸關過街塔成奉勅譔碑賜白金五十兩四年奉勅譔成宗御殿碑賜白金五十兩五年知貢舉進翰林學士承旨榮祿大夫知制誥兼修國史初御史大夫也先帖木兒在宿衛上問在廷儒臣乃以公姓名對上曰斯人歷事累朝制作甚多朕素知之今修三史尤任勞勲汝其諭旨丞相超授爵秩用勸賢能明日大夫出遭丞相於延春閣下傳旨旣畢立具奏牘上大悅稱快者再三命左丞相董守簡賜宴史館明日入謝平章納麟謂曰

吾人在省臺未見昨日天顏如是之喜也張公起巖先爲承旨位第六公所代第四公曰張公吾榜首又先拜命今位次反居末雖曰君命誼有未安乃固讓之及宋史後進上喜書成賜白金百兩金幣表裏段四乞致仕還鄉不允六年御史臺奏除福建閩海道肅政廉訪使行次浙西疾復作因請致仕九年夏遣使賜白金五十兩內醞二尊勅讓故相冀寧忠宣王鐵木兒塔識神道碑文公自休致作南山隱居優游山水之間謝絕世務日與昆弟故舊觴詠自適有終焉之志十年秋復授承旨遣使賜內醞二尊以老病力辭不獲湖廣省臣知朝廷注意於公屬養疾武昌

歐陽文公集

附錄

行狀

五

道官日往候問勸公北行控辭之文屢上不允又遣使賜內醞二尊趣行適車駕還自開平迎謁行殿復有旨行禮朝賀聚會皆免冬奉勅讓定國律讓選格序河決白茆口大興工役勅公讓河平之碑十二年春宜赴延春閣集議肆赦草詔夏乞致仕陳情誠懇乃特授湖廣等處行中書省左丞相致仕賜楮幣萬貫玉帶一條仍給全俸從子遜老授本省檢校官孫佑持授湖廣道宣慰使司照磨俾得便養將行降旨不允依前承旨進階光祿大夫辭不獲十三年上如開平中途賜楮幣萬五千貫尋奉勅讓金字藏經序新建壽元忠國寺碑文十四年知貢舉又充廷試讀

卷官至是始知家罹寇禍二兄一弟相繼去世親屬四百指死亡大半配冀國夫人謝氏避難郡城亦沒公聞變哀甚上深憫念賜楮幣萬五千貫傳旨慰勞復命遜老以資成庫副使給驛還鄉取聚所餘骨肉遷寓武陵奉勅撰三皇廟新置雅樂記大赦天下草詔時以久病不能出外命就家具稿秋皇太子遣宮臣齋親書經訓二大字內醞二尊以賜上箋稱謝皇太子命侍臣解說藏諸端本堂十五年譔皇太子玉冊文賜金幣表裏段楮幣萬五千貫十六年上遣近臣賜楮幣萬五千貫撫諭高句驪草詔十七年春乞致仕欲由蜀還鄉不允大赦天下宣赴內府草詔時

歐陽文公集

附錄

行狀

七

久病不能步履丞相傳旨肩輿至延春閣下上問丞相斯人在朝最久製述益富年壽今幾何丞相悉以對賜楮幣二萬五千貫遣執政存勞皇太子千秋節賜楮幣萬貫十二月戊戌薨於崇教里寓舍中書以聞上賜以楮幣二萬五千貫皇太子賻以楮幣五千貫明年三月壬寅權葬京西宛平縣香山鄉石井村公既喪其長子達老後請於朝以長兄之孫佑持爲孫今授從仕郎侍儀司通事舍人壻卜士駿靖州安撫司經歷教授李崇志有圭齋文集若干卷惟公學於未有科第之先沈潛經傳所親承多故宋耆碩而性度雍容含宏纘密出宰二縣寬仁恭愛處已儉約

爲政廉平不苛視民如子舉善以勸未嘗笞辱故歷官四十餘年在朝之日居四之三三任成均兩爲祭酒六入翰林而三拜承旨修實錄大典三史皆大制作屢主文衡兩知貢舉及讀卷官凡宗廟朝廷雄文大冊播告萬國所用制誥多出公手海內名山大川釋老之宮王公貴人墓隧碑銘得公文詞爲榮片文隻字流傳人間咸知貴重文章道德卓然名世引拔善類贊勳衛道黼黻治具與有功焉於是中外莫不敬服及大盜之起相國徂征公嘗陳論事宜謂當請命太廟而後行招捕並行則脅從誑誤者可生六部諸司分官從行糜費供給歲月稍久必致公私匱乏

歐陽文公集

附錄 行狀

七

嚴禁州縣科歛不公一軍失利他軍不援罪在主將蒙古漢軍義民一體論賞不可分別輕重徐州旣平當順流東下耀武揚州遣將分勁軍一支北助河州軍討平淮西一支南助池州軍討平江州規圖湖廣江西道遣使督南陽圖襄陽四川軍圖湖廣河南軍急攻汝南約諸軍以十月夷黃州賊巢明立賞格正賊降者蠲其罪仍與相副官職土豪能殺賊來降者亦官之大軍所至傳諭脅從者別置一所則賊勢自孤有殺降俘男女者殺士之逼曉軍務立加旌擢至於謹烽燧精間諜皆不可缺其後政府求疏時事公首言京師天下根本車駕行幸宜於侍衛親軍中遴

選射藝絕倫方畧出衆者教練守禦要害陝西四川宜擇
德望重臣素習武備深曉民事令其久任責以保障一方
不宜數數遷除併力克復山東以制河南兩淮選猛將擇
精兵萬餘人出賊不意以取武昌邊官省掾宜擇公平廉
謹之人俾專兵事右司選官一員專一巡檢克復州郡覈
其無籍戶若干今有若干總兵官與監臨上司結狀申報
則公經濟之術卽是可窺其萬一矣素宦學京師嘗從公
於史館晚辱與進尤至謂可以承斯文之遺緒然素之行
不佞無能爲役佑持請序述公之世家出仕行實上之太
常史官以俟采擇焉謹狀

歐陽文公集

附錄 行狀

六

翰林學士承旨榮祿大夫知制誥兼修國史危 素狀

圭齋文公傳 危素撰

楚文公諱元

原名口敬避廟諱

字原功別號圭齋萬公六世孫

殊令宜春留居分宜防里祖係由防里徙安福北鄉之桂里祖安時又自桂里徙長沙瀏陽之馬渡公世爲瀏陽人

三世皆爲儒官雅有著述曾祖新與巽齋公同事嶽麓書院以文行稱祖逢泰潭州學錄考龍生道州教授母李氏公年八歲卽知屬文十歲有黃冠者至塾周視諸生注目視公稱耳白過面目光射人狀元才廊廟器言旣而去忽不見又有部使者見公大異之命賦梅花詩立成十首晚歸增至百首使者稱不絕口每庠試必占高等數年下帷

歐陽文公集

附錄 傳

尤

人莫見其面伊洛原委百家子史靡不淹貫元仁宗延祐元年甲寅會下詔設科取士公年三十一以天馬賦中湖廣第一明年乙卯賜進士及第授承事郎知平江州旋丁李夫人憂服闋遷蕪湖尹泰定元年甲子改承直郎武岡縣尹四年丁卯召入爲國子博士考試進士於禮部陞國子監丞致和元年戊辰授翰林待制奉議大夫兼國史院編修官攝院事參贊機務明宗改元天歷郊廟建后立儲肆赦之文皆經撰述且條陳時政實封以聞多所推行文宗新置藝文監於奎章閣學士院選清望之官乃問蕪湖縣尹歐陽元素有能聲今安在羣臣對曰爲翰林待制卽

取奏目御書歐陽元可擢藝文少監公拜命入謝文宗大
悅問曰汝爲廬陵族長沙族耶應對稱旨至順元年庚午
奉詔纂修皇朝經世大典明年辛未書成文宗特筆藝文
少監歐陽元可陞大監順帝元統二年甲戌拜翰林直學
士中憲大夫知制誥同修國史奉勅編修四朝實錄詔修
先師兗國公廟成奉勅撰碑明年乙亥春兼國子祭酒進
階中奉大夫詔侍講學士張起巖爲撰公先塋碑至元二
年丙子得請還家監碑三年丁丑陞侍講學士中奉大夫
知制誥同修國史四年戊寅復國子祭酒通奉大夫五年
己卯患足疾乞歸不允奉勅撰宣聖廟碑六年庚辰子達
老卒公過哀疾復作乞還不允勉諭諄切復拜翰林學士
資善大夫知制誥同修國史懇辭亦不允明年辛巳至正
改元九月南歸三年癸未詔修遼金宋三史召爲總裁官
四年甲申奉勅撰成宗御殿碑五年乙酉知貢舉進翰林
學士承旨榮祿大夫知制誥兼修國史宋史成蒙厚賚乞
致仕不允十二年壬辰宣赴延春閣集議肆赦草詔懇乞
致仕乃特授湖廣等處行中書省右丞相致仕厚賚仍給
全俸從子遜老授本省檢校官孫佑持授湖廣宣慰使司
照磨俾得便養十三年癸巳又厚賜十四年甲午知貢舉
又充廷試讀卷官時公家罹寇禍親屬死亡甚多夫人謝

氏亦故公聞變哀苦上深憫念厚賚命遜老以資成庫副
使給驛還鄉安輯又勅撰三皇廟新置雅樂記十五年乙
未譔皇太子玉冊文十六年丙申遣內臣厚賞十七年丁
酉春乞致仕不允宣赴內府草詔時久病不能步履丞相
傳旨肩輿至延春閣上與皇太子皆有賞賚是年十二月
薨於崇教里寓舍上與皇太子皆厚賻有差明年戊戌葬
於宛平縣香山鄉石井村公宰二邑所至有聲歷官四十
年在朝之日居四之三放其三任成均兩爲祭酒六入翰
林三拜承旨兩知貢舉凡大制作大修撰多出公筆海內
名士以得公文詞爲榮片紙隻字流落人間靡不珍重道
歐陽文公集 附錄傳 三

德文章卓然冠世引拔善類贊襄化理而四方有警籌畫
方畧無不奇中社稷之功莫大焉蓋經濟之學文武之才
光昭史冊此特傳其概耳贈楚國公諡文所著有圭齋文
集行於世勅建書院於瀏陽馬渡之南山詔賜祭田百畝
立廟於舊址有司春秋祀之世蔭奉祀生員一名以奉祀
焉

